

# Popular è puspè en il trend

**(anr/gc) Ina giada era popular e folcloric plitost pegiurativ. Oz perencunter è quai che ha da far cun musica populara, costums e lutgar puspè en il trend.** Il medem vala era per occurrenz sco Chalandamarz, ils Stailers (trais Retgs) e processions ch'è tut daventà – tant sin il champ profan sco religius – part da la vita da mintgadi. Co quai sa cuntinuescha en realità è da leger e vesair en la novissima ediziun da la «Terra Grischuna». Be in pitschen sguard.

Lunga tradiziun en il Grischun ha il teater popular. I na deva strusch in vintg che n'aveva betg in'uniun dramatica che menava si teater onn per onn – e quai en tuts trais linguatgs chantunals. Ils iniziants eran ils chors, las societads da musica ni era las cumpagnias da mats. Vinters èn era vegnids pli e pli gieus en il liber.

Il lutgar ha ses origin en il cumbat tranter pasturs e purs. Oz è quai in sport naziunal ch'entusiasmescha in grond public, era en noss Chantun. – Il sa vestgir era – sper sia funcziun da proteger – ina pussaivladad per sa differenziar visavi ils auters e veva l'intent da mussar ed exprimer identitad vulida.

La mecanisaziun ha gì sco consequenza ch'il territori da muntogna vegn anc cultivà. Mo entaifer ina generaziun è la lavur sin il funs sa midada da radent. Qua tras èn usits svanids ch'entiras generaziuns han cultivà.

Dapi onns flurescha dentant la musica populara en il Grischun. Oriundamain era igl insaquants Jenics che tgiravan quella. Oz datti en il Grischun pli che 70 furmaziuns che cultiveschan quella, en il rom da la tradiziun, mo era tras experimentar tenor plaschair.

Zunt impurtantas – ed era pussentas – eran antruras las cumpagnias da mats. En insaquants lieus – sco a Domat – èn ellas vinavant activas e sa mussan tar grondas festas, sco da Sontgilcrest, en lur bellas uniformas. Ellas han ina lunga tra-



La revista «Terra Grischuna» è da vast cuntegn, illustrada e variada bain.

MAD

diziun ed èn adina puspè s'adattadas al basegn dal temps.

Na da survesair è ch'i dat oz era novas furmas che portan tut in'otra cultura en nossa regiun. Ins numna talas events, sco p.ex. ils open airs, che daventan pli e pli ils novs usits. Auters èn percenter svanids, siond ch'els n'avevan pli nagin senn u èn daventads l'unfrenda dal progress tecnic. Intgins han denton pudì sa mantegnair. Il spiert dal temps èsi che decida tge ch'è oz anc usit.

Dètg vasta è era la sparta «Magazin»

en la «Terra Grischuna». Regurdà vegn qua t. a. a la fundaziun da l'Unìun grischuna da chatscha da patentà avant 100 onns. La planisaziun tras quella haja purtà sauns effectivs tar las selvaschinas. – Sut il titel «Chant fa punts da linguatg a linguatg» vegn preschentada la musica Corin Curschellas. Ses chant e sia musica chattan in bun resun. – Descritta è era ina spassegiada sin il Trutg dal Flem, che maina davent dal Segnas a la staziun da val da las Pendicularas a Flem.